

Morning Dogri (NSD) National News Bulletin 29-08-2024

आकाशवाणी

खबरां विकास शर्मा कोला।

- 1 सरकारै राष्ट्रीय औद्योगिक गलियारा विकास प्रोग्राम तैहत् 12 नमें औद्योगिक स्मार्ट शहर ते 730 प्राइवेट एफएम चैनलें दी ई-निलामी गी मंजूरी दित्ती ऐ।
- 2 जम्मू कश्मीर च दुए गेड़ दे असेंबली चुनाएं लेई अधिसूचना अज्ज जारी कीती जाग।
- 3 मौसम विभाग नै सौराष्ट्र ते कच्छ प्रांतै च बड़ी भारी बरखा दी पेशगोई कीती ऐ।
- बंगलादेश नै जमात-ए-इस्लामी ते इस्लामी छात्र शिविर संगठनं पर लग्गी दी रोक गी हटाई दित्ता ऐ।
- मुख्य भरै च अज्ज खेड़डें सरबन्धी राष्ट्रीय ध्याड़ा मनाया जा करदा ऐ।
- पैरालंपिक खेड़डां 2024 पैरिस च शुरू होई गेइयां न।

<><><><><><>

Smart Cities

केन्द्रीय मंत्रिमंडल नै देसा च औद्योगिक परिदृश्य गी बदलने लेई राष्ट्रीय गलियारे विकास कार्यक्रम तैहत् 12 नमें ग्रीनफील्ड औद्योगिक स्मार्ट सिटी गी मंजूरी देई दित्ती ऐ। नमीं दिल्ली च कैबिनेट दी बैठक मगरा मीडिया गी संबोधत करदे होई सूचना ते प्रसारण मंत्री अश्विनी वैष्णव होरें आखेआ जे इनें औद्योगिक क्षेत्रें च कुल 28 ज्हार 602 करोड़ रुपे दा अंदाजन निवेश होग। उनें आखेआ जे इनें परियोजनाएं कन्नै 10 लक्ख सिद्धे तौरा पर ते 30 लक्ख अप्रत्य तौरा पर रोजगार पैदा होंगन। एह प्रोजेक्ट 10एं राज्यें च कम्म करा'रदियां न ते 6 बड़डे गलियारे दे कन्नै कन्नै रणनीतिक तौरा पर योजनाबद्ध न। एह न-उत्तराखंड च खुरपिया, बिहार च गया, पंजाब च राजपुरा-पटियाला, तेलंगाना च जहीराबाद, महाराष्ट्र च दीधी, आंध्रप्रदेश च ओवकिल ते कोप्पार्टी, केरल च पलकड़, राजस्थान च जोधपुर-पाली ते उत्तर प्रदेश च आगरा ते प्रयागराज केन्द्रीय मंत्रिमंडल नै 234 नमें शहरें च 7 सौ 30 प्राइवेट एफएम चैनलें लेई ई-निलामी करने दे प्रस्ताह गी मंजूरी देई दित्ती ऐ। इस गैह दा मकसद

मातृभाषा च मकामी सामग्री गी बढ़ावा देना ते नमें रोजगार दे मौके पैदा करना ऐ। नमीं दिल्ली च मीडिया गी जानकारी दिंदे होई सूचना ते प्रसारण मंत्री अश्विनी वैष्णव होरें आखेआ जे इस फैसले कन्नै एफएम रेडियो गी टायर-2 ते शैहरे दी श्रेणी च जिनें गी दायरे हेठ नेई आंदा गेदा ऐ, तोड़ी पुज्ज बनाग। इस निलामी लेई अंदाजन रिजर्व राशि 784 करोड़ रने शा मती ऐ। एह्दे तैह्त् उत्तर प्रदेश च 38 नमें निजी एफएम चैनलें दी निलामी, आंध्रप्रदेश च 22, राजस्थान च 19, बिहार च 18, महाराष्ट्र ते तमिलनाडू च 11-11, पच्छिम बंगाल च 13 ते 6 निजी एफएम चैनलें दी निलामी असम च कीती जाग। मंजूर कीते गेदे मते सारे शैहर विकास दी तांग रखने आले जिले ते खब्बे धड़ें आले अत्तवाद प्रभावत इलाके न ते एह्दे कन्नै इनें इलाकें च सरकार दी पुज्ज होर मजबूत होग ते रोजगार दे नमें मौके बी पैदा होंगन।

<><><><><><>

JK 2nd Phase

जम्मू कश्मीर च दुए गेड़ दे विधानसभा चुनां दी अधिसूचना अज्ज जारी कीती जाग। साढ़े जम्मू संवाददाता मूजब इस गेड़ च गांदरबल, श्रीनगर, बडगाम, राजौरी, पुंछ ते रियासी जिले च 26 विधानसभा इल्कें च वोट पोआए जांगन। नामांकन दर्ज करने दी खीरी तरीक 5 सितम्बर ऐ जदके नामांकन पत्रें दी जांच अगले दिन कीती जाग। मेदवार जेगर चाहन तां 9 सितम्बर तगर अपनी मेदवारी परताई सकदे न। इस गेड़ लेई मतदान 25 सितम्बर गी होग। हद्दबंदी दे बाद प्रदेश च असेंबली हल्कें दी गिनतरी 83 थमां 90 करी दित्ती गेदी ऐ।

<><><><><><>

PM-Pragati Meeting

प्रधानमंत्री नरेन्द्र मोदी होरें कल केन्द्र ते राज्य सरकारें दी भागीदारी कन्नै असरदार शासन बवस्था ते बेल्ले सिर कार्यक्रमें गी लागू करने दी सूचना ते संचार तकनीक पर आधारित मंच प्रगति दी 44मीं बैठक दी प्रधानता कीती। श्री मोदी सरकार दे त्रीए कार्यकाल च लाई गेदी एह् प्रगति दी पैहली बैठक ही। बैठक दरान श्री मोदी होरें इस गल्ले पर जोर दित्ता जे सरकार दे हर इक अधिकारी गी संवेदनशील बनाया जाना लोड़चदा ऐ। उनें आखेआ जे परियोजनाएं च चिर कन्नै नां छड़ी लागत बधदी ऐ सगुआं आम लोक उस परियोजना दे मेदें मताबक लाह् थमां बी वंचित होई जंदे न। प्रधानमंत्री होरें आखेआ जे “एक पेड़ मां के नाम”

अभियान परियोजना विकास करदे बेल्ले पर्यावरण दी राक्खी च मदाद करी सकदा ऐ। गल्लबात दे दरान प्रधानमंत्री होरें अमृत योजना दे दुए गेड़ ते जल जीवन मिशन कन्नै सरबंधत सार्वजनिक शकैतें दी बी समीक्षा कीती। मोदी होरें मुख्य सचिवें गी अमृत योजना दे दुए गेड़ तैहत् जारी कम्में दी निजी तौर पर निगरानी करने दी सलाह बी दित्ती।

<><><><><><>

Weather

भारती मौसम विभाग नै कल तगर सौराष्ट्र ते कच्छ च भारी बरखा बरने दी पेशगोई कीती ऐ। मौसम विभाग नै गुजरात, राजस्थान, महाराष्ट्र, कोंकण ते गोवा च अज्ज हल्की थमां दरमेयानी बरखा बरने दी पेशगोई बी कीती ऐ। मौसम अजेंसी ने आखेआ ऐ जे अज्ज बंगाल दी उत्तर ते कन्नै लगदी मध्य खाड़ी उप्पर घट्ट दबाह आला इलाका बनने दी संभावना ऐ ते अगले 24एं घेंटे दरान एह्दे दक्खनी ओडिशा ते उत्तर आंध्रप्रदेश दे तटें दे नेड़े पच्छिम उत्तर-पच्छिम बक्खी जाने दी संभावना ऐ।

<><><><><><>

Bangladesh

बंगलादेश च प्रोफेसर मुहम्मद यूनुस हुंदी अगुवाई आली अंतरिम सरकार नै कल जमात-ए-इस्लामी ते ओह्दी छात्र शाखा इस्लामी छात्र शिविरें उप्पर बंदश हटाई दित्ती ऐ। इस सरबंधै च गृह मंत्रालय नै इक अधिसूचना जारी कीती। एह्दे च आखेआ गेआ जे आतंकवाद ते हिंसा च बंगलादेश जमात-ए-इस्लामी ते ओह्दे छात्र संगठन इस्लामी छात्र शिविर दी संलिप्ता दा कोई पक्का सबूत नेइं ऐ। इस करी आतंकवादी विरोधी अधिनियम 2009 दी धारा 18 च प्रदान शक्तिएं तैहत् सरकारै पिछले परि-पत्र गी रद्द करी दितता ऐ। जेह्दे च जमात, शिविर ते ओह्दे प्रमुख संगठनें पर बंदश लाई गई ही।

<><><><><><>

Rajnath

रक्षामंत्री राजनाथ सिंह होर अज्ज आंध्रप्रदेश दे विशाखापत्तनम च पूर्वी नौसैनिक कमान-ईएनसी दा दौरा करै करदे न। इस दरान रक्षामंत्री विशाखापत्तनम दे नौसेना केन्द्र च

इक कार्यक्रम च हिस्सा लैंगन जित्थें ओह पूर्वी नौसैनिक कमान दे वरिष्ठ अधिकारिएं कन्नै बचार बंटादरा करगंन। ओह नौसेना दे बक्ख-बक्ख अभियानें दी समीक्षा बी करगंन। श्री सिंह होर विशाखापत्तनम थमां अज्ज दपैहरी मगरा केरल दे तिरुवनंतपुरम जांगन।

<><><><><><>

India-Russia

एमरजेंसी प्रबंधन दे खेत्तर च सैह्योग पर भारती ते रूसी आयोग दी दूई सांझी बैठक कल मास्को च शुरू होई। भारती प्रतिनिधिमंडल दा नेतृत्व गृह राज्यमंत्री नित्यानंद राय करै करदे न। बैठक दे पैहले दिन ब'रे 2025-26 लेई एमरजेंसी प्रबंधन दे खेत्तर च सैह्योग बारे भारत-रूस सांझे आयोग दी कार्ययोजना पर श्री राय ते रूसी संघ दे नागरिक सुरक्षा, आपात स्थिति ते कुदरती आपदा प्रबंधन दस्तखत कीते। दोनूं मुख्य 2025-26 दे दरान इस योजना गी लागू करने पर सैहमत होए ते उनें आपदा प्रबंधन दे खेत्तर च सब्बने शा उत्तम तकनीकें दा अदान प्रदान जारी रखने दा बी फैसला कीता। एह बैठक भारत ते रूस बश्कार पिदले समझौतें पर अमल करने दी रणनीति बनाने लेई महत्वपूर्ण ऐ। एमरजेंसी प्रबंधन दे खेत्तर च सैह्योग बारे भारत ते रूस दे सांझे आयोग दी पैहली बैठक 2016 च नमीं दिल्ली च आयोजित कीती गई ही।

<><><><><><>

National Sports Day

अज्ज राष्ट्रीय खेड्ड दिवस मनाया जा'रदा ऐ। एह ध्याड़ा हॉकी दे सब्बने शा शानदार ते बड्डे खडारी मेजर ध्यानचंद हुंदी जयंति दे मौके पर मनाया जंदा ऐ। हर ब'रे दे ध्याड़ा 29 अगस्त गी खेड्डें दी महत्ता बारे जोर देने लेई ते भारतीय हॉकी च मेजर ध्यानचंद हुंदे अनमुल्ले योगदान गी चेता नुआने दे कन्नो कन्नी उंदे सम्मान च मनाया जंदा ऐ। युवा मामले ते खेड्डें सरबंधी केन्द्री मंत्री डॉ. मनसुख मांडविया होरें राष्ट्रीय खेड्ड दिवस दे जश्न च हिस्सा लैने दे तौरा पर सब्बने गी बाहर खेड्डने आली खेड्डें च घट्टोघट्ट इक घैंटे लेई हिस्सा लैने दा आह्वान कीता ऐ।

<><><><><><>

Paris Paralympic

पैरिस च पैरा ओलंपिक्स खेड्डा 2024 दा औपचारिक तौरा पर उद्घाटन होई गेआ ऐ। उद्घाटनी समारोह दा आयोजन एवेन्यू डेस चैंप एलिसी ते ओह्दे मगरा प्लेस डे ला कानकार्ड च कीता गेआ। भारत दी तरफा पैरा एथलीटें सुमित एंटिल ते भाग्यश्री जाधव होरें भारतीय दल दी अगुवाई कीती जेहड़ी 12 बक्ख-बक्ख खेड्डें च 84 खडारिएं कन्नै राष्ट्र दे पैरालंपिक इतेहास च अजें तगर दी सारें शा बड्डी टीम ऐ। टोक्यो 2020 पैरालंपिक च नेता सुट्टने च सुन्ने दा तगमा जित्तने आले सुमित एंटिल हुंदे थमां राष्ट्र गी इक बारी परतियै बेह्तरिन प्रदर्शन दी मेद ऐ।

<><><><><><>

PM-Paraolympics

प्रधानमंत्री नरेन्द्र मोदी होरें आखेआ जे पैरिस पैरालंपिक 2024 च हिस्सा लैने आले भारतीय खडारिएं गी 140 करोड़ देशवासिएं शुभकामनां दित्तियां न। इक सोशल मीडियो पोस्ट च मोदी होरें आखेआ हर इक एथलीट दी दलेरी ते लगन पूरे मुख्ये आस्तै प्रेरणा दे स्रोत्र न। उनें आखेआ जे हर कोई उंदी सफलता आस्तै प्रार्थना करा'रदा ऐ।

<><><><><><>